



**REPUBLIKA E SHQIPËRISË
-AUTORITETI I KONKURENCËS-
KOMISIONI I KONKURENCËS**



V E N D I M

Nr. 238, datë 26.07.2012

“Mbi

autorizimin e përqendrimit të realizuar nëpërmjet përfittimit të plotë të kontrollit në shoqërinë V.D.M Invest Comm. VA, nëpërmjet blerjes së 99.99% të aksioneve nga shoqëria Japan Tobacco International Holding B.V.”

Komisioni i Konkurrencës i përberë nga :

- Znj. Lindita Milo (Lati) Kryetar
- Znj. Rezana Konomi Zv/kryetar
- Znj. Servete Gruda Anëtar
- Z. Koço Broka Anëtar
- Znj. Iva Zajmi Anëtar

Në mbledhjen e tij të datës 26.07.2012, shqyrtoi çështjen me :

Objekt: Autorizimin e përqendrimit të realizuar nëpërmjet përfittimit të plotë të kontrollit në shoqërinë V.D.M Invest Comm. VA, nëpërmjet blerjes së 99.99% të aksioneve nga shoqëria Japan Tobacco International Holding B.V.

Baza ligjore: Ligji nr. 9121, datë 28.07.2003 “Për mbrojtjen e konkurrencës”(i ndryshuar), neni 24, shkronja d, neni 2, nenet 10-12, 13 dhe 16, në veçanti Kreu III “Përqendrimet e ndërmarrjeve” nenet 53-64, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit dhe mundësinë për njoftim të thjeshtuar” dhe Formulari “Për njoftimin e përqendrimit”.

Komisioni i Konkurrencës, pas shqyrtimit të raportit mbi njoftimin e përqendrimit Japan Tobacco International Holding B.V / V.D.M Invest COMM. Va, dhe relacionit të Sekretarit të Përgjithshëm,

V Ë R E N S E:

1. Transaksioni dhe përqendrimi

Përqendrimi realizohet në bazë të 'Marrëveshjes për Shitje Aksionesh' e lidhur më datë 23 Maj 2012, ndërmjet palëve GT & Co (askionerit të shoqërisë Target) dhe JT International Holding B.V (blerësi) me qëllim përfundim i kontrollit të V.D.M Invest Comm. VA dhe shoqërive të saj bija.

Transaksioni përfshin blerjen 99.99% të aksioneve të shoqërisë target dhe bijave të saj dhe si pasojë edhe kontrollin dhe menaxhimin në këto shoqëri.

Transaksioni i realizuar ndërmjet palëve pjesëmarrëse në kuptim të nenit 10/1/b të Ligjit, është ndryshim kontrolli në formën e ndryshimit të pronësisë. Gjithashtu përqendrimi i njoftuar përmbush edhe kushtet e nenit 12 të Ligjit për sa i përket xhirove (neni 12/1) dhe është njoftuar brenda afatit të parashikuar (neni 12/2).

2. Palët në transaksion

- ❖ **Jappan Tobacco International Holding B.V (JTI Holding B.V)**, në cilësinë e **blerësit**, me seli në Hollandë, kryen aktivitet në fushën e prodhimit dhe shitjes së cigareve të prodhuara nëpërmjet makinerive gjithashtu edhe në prodhimin dhe shitjen e produkteve të tjera të duhanit përfshirë atë të dredhur, duhanin që thithet me hundë, purot dhe purot e holla.
- ❖ **V.D.M Invest Comm. VA** në cilësinë e **shoqërisë target**, me seli në Belgjikë, është një biznes familjar në Flander-in perëndimor. Shoqëria target ofron një seri të gjerë përzierjesh dhe shijesh duke përfshirë dhjetë deri në pesëmbëdhjetë tipe duhani i cili kryesisht vjen nga Brazili, India, Indonezia, Malaui, Zambia, Polonia, Italia , Franca.

3. ANALIZA E KONKURRENCËS

Xhiro totale e palëve pjesëmarrëse në përqendrim **në tregun ndërkombëtar** për vitin 2011 është XXX miliard Lekë:

- *Japan Tobacco Group*: XXX miliard JPY = XXX miliard Euro¹ = XXX miliard Lekë
- *VDM Invest*: XXX milion Euro = XXX miliard Lekë

Xhiro totale e palëve pjesëmarrëse në përqendrim **në tregun e brendshëm**, për vitin 2011 është XXX miliard Lekë:

- *JT International Tirana* : XXX miliard Lekë
- *VDM Invest* ka realizuar shitje në vendin tonë me vlerë XXX Euro = XXX milion Lekë

3.1. Tregu përkatës

¹ Periudha 01.04.2011-31.03.2012, Kursi i këmbimit 1JPY:0.00927 Euro. Kursi mesatar i këmbimit; 1 Euro= 140.33 lek Burimi: Banka e Shqipërisë.

Referuar nenit 3, pika 7, të Ligjit, përcaktimi “treg përkatës”, përfshin dy komponentë:

a) tregu i produktit, dhe b) tregu gjeografik.

3.1.a Tregu i produktit:

Japan Tobacco është aktive në prodhimin dhe shitjen e cigareve të prodhuara nëpërmjet makinerive përmes filialit të saj JTI HBV dhe filialet e kësaj të fundit (JTI). Në Shqipëri, JTI HBV është prezent vetëm në tregun e cigareve të prodhuara nga makineritë nëpërmjet filialit të saj, JT International Tirana Shpk. V.D.M Invest Comm. VA, shoqëria target e këtij transaksioni në nivel ndërkombëtar është prodhues dhe distributor i duhanit të dredhur. Veprimtaria e kësaj shoqërie në vendin tonë konsiston vetëm në shitjen e produkteve të saj (duhanit dridhe/ përgatite vetë) tek distributorët vendas.

Referuar veprimtarisë së palëve, analiza e efekteve që do të sjellë transaksioni në fjalë do të përqendrohet në tregun e cigareve të prodhuara nëpërmjet makinerive dhe duhanit me të dredhur.

3.1.b Tregu përkatës gjeografik:

Për analizimin dhe vlerësimin e efekteve që do të shkaktojë ky transaksion në tregun përkatës të produktit, treg përkatës gjeografik është konsideruar tregu kombëtar.

3.2 Struktura e tregut dhe vlerësimi i konkurrencës

Palët pjesëmarrëse në transaksion në vendin tonë nuk janë të pranishëm në të njëjtin treg përkatës produkti. JT International Tirana është prezent në tregun e cigareve të prodhuara nëpërmjet makinerive, ndërsa veprimtaria e shoqërisë target V.D.M Invest Comm. VA në vendin tonë konsiston vetëm në shitjen e produkteve të saj si duhani i dredhur. Kjo shoqëri nuk është prezent në tregun shqiptar nëpërmjet ndonjë shoqërie të zotëruar prej saj. Produktet e saj shiten nëpërmjet një distributori, i cili nuk zotërohet nga kjo e fundit.

Për vitin 2011 rezulton se JT International Tirana ka patur rreth 15% të tregut të importit të cigareve të prodhuara nëpërmjet makinerive. Konkurrentët kryesorë të JTI në këtë treg janë subjektet Philip Morris Albania Shpk (PM), AGNA dhe British American Tobacco Albania (BAT). Philip Morris Albania dhe AGNA ngelen kompanitë kryesuese në treg sa i takon importit me respektivisht rreth 31.4% dhe 30% të totalit të fijeve të cigareve të importuara

Për sa më lart,. përqendrimi në fjalë nuk shkakton mbivendosje të aktivitetit të palëve dhe as rritje të pjesëve të tyre të tregut në nivel horizontal.

Sa i takon aspekteve vertikale, ekziston një marrëdhënie e kufizuar vertikale mes palëve në nivel ndërkombëtar. Në tregun e brendshëm, sa i takon shpërndarjes së produkteve, JT International Tirana e kryen vetë shpërndarjen dhe shitjen e produkteve të saj. Aktiviteti shpërndarës i saj është i limituar vetëm tek produktet e veta të duhanit. Ndërkohë, produktet e shoqërisë target VDM Invest COMM VA. shpërndahen në tregun tonë nëpërmjet një distributori tjetër, shoqërisë IGLA Shpk. Të dy shoqëritë përdorin kanale të ndryshme shpërndarjeje dhe shitjeje të produkteve të tyre. Pra, nuk ka mbivendosje të aktivitetit të palëve dhe në këtë veprimtari.

Përqendrimi i realizuar nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE

Në bazë të nenit 24, shkronja d, dhe nenit 56 pika 1, të Ligjit nr. 9121, datë 28.07.2003 “Për mbrojtjen e konkurrencës”:

VENDOSI:

1. Të autorizojë përqendrimin e realizuar nëpërmjet përfutimit të plotë të kontrollit në shoqërinë V.D.M Invest Comm. VA, nëpërmjet blerjes së 99.99% të aksioneve nga shoqëria Japan Tobacco International Holding B.V.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Servete GRUDA	Koço BROKA	Iva ZAJMI	Rezana KONOMI
(_____)	(_____)	(_____)	(_____)
Anëtar	Anëtar	Anëtar	Zv. Kryetar
			Lindita MILO (LATI)
			(_____)
			K R Y E T A R